



# NALUNAARUTIT

## 2021

Nr. 65

20. november 2021

### **Nuummi il. il. killilersuinerit pillugit Namminersorlutik Oqartussat nalunaarutaat**

Nappaatit tunillaassortut akiorniarlugit iliuitsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut al-lanngortinneqartumi §§ 6, 6 a, 12 a, 12 b, § 21 b aamma § 29 imm. 2 aamma 3 naapertorlugit aalajangersarneqarput:

#### *Atuuffia*

§ 1. Nalunaarut una illoqarfinni Nuuk aamma Upernavimmi kiisalu Avannaata Kommunia-ni nunaqarfinni ataani taaneqartuni atuutissaaq:

- 1) Tasiusaq.
- 2) Upernavik Kujalleq.
- 3) Nutaarmiut.
- 4) Nuussuaq.
- 5) Innaarsuit.
- 6) Naajaat.
- 7) Aappilattoq.
- 8) Kangersuatsiaq.
- 9) Kullorsuaq.

*Imm. 2.* Nalunaarutip atuuffissai pillugit imm. 1-imi aalajangersakkat Naalackersuisut aala-jangiineratigut annertusineqarsinnaapput. Taamatut aalajangiinerit inatsisitigut sunniuteqaler-sinniarlugit Naalackersuisut qarasaasiakkut nalunaaruteqartarfiatigut saqqummiunneqassap-put.

*Imm. 3.* Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaannermik naalagaaf-fimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

*Imm. 4.* Nalunaarut katersuunnernut, politikikkut allatulluunniit isummersornissamik sunni-  
iniarnissamik siunertalinnut atuutinngilaq.

*Imm. 5.* Nalunaarut eqqartuussivinnut atuutinngilaq.

*Imm. 6.* Nalunaarut ulluunerani neqeroorutinut namminersortunut pisortaniillu pigineqar-tunut, atuarfinnut, ilinniarfeqarfinnut il.il. atuutinngilaq, nappaatit tunillaassortut akiorniar-lugit iliuitsit pillugit Inatsisartut peqqussutaanni § 22 takuuk.

*Imm. 7.* Nalunaarut nammineq angerlarsimaffinni aaqqissuussinernut il.il. atuutinngilaq.

*Imm. 8.* Nunatsinni Nakorsaaneqarfik nalunaarummit immikkut akuersissuteqarsinnaavoq.

§ 2. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutsinneqassanngitsut aalajangerneqarsinnaavoq.

*Imm. 2.* Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

*Imm. 3.* Inunnut Issittumi Sakkutooqarfimmi tassanilu immikkoortortaqaqarfinni sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

*Imm. 4.* Inunnut Peqqinnissaqarfimmi sulisunut Nunatta Nakorsaaneqarfia imm. 1 naapertorlugu aalajangiisassaaq.

*Init ilaannut taakkununnгалu attuumassutilinnut nunaminertanut, kikkunnilluunniit iserfigineqarsinnaasunut tunngatillugu piumasagaatit*

§ 3. Inuit Covid-19-imut tamakkiisumik akiuussuserneqarsimanermit uppersaammik takutitsisnaanngikkunik imm. 2-mi taaneqartuni inineqqusaanatillu taakkununnгалu attuumassutilinni nunaminertaneeqqusaanngillat.

*Imm. 2.* Init taakkununnгалu attuumassuteqartut nunaminertat kikkunnilluunniit iserfigineqarsinnaasut aamma nalinginnaasumik inunnit sivikitsuinnaanngitsumik isersimaffigineqarsinnaasut imm. 1-imut ilaatinneqarput, assersuutigalugu:

- 1) Sutorniartarfiit, cafiit, imerniartarfiit, diskotekit assigisaallu aamma tamakkununnga attuumassuteqartut silami nunaminertat.
- 2) Kulturikkut suliffeqarfiit - tassunga ilanngullugit ilaatigut Kulturikkut Illorsuit, filmeriartarfiit, katersugaasiviit inersuillu saqqummersitsiviit.
- 3) Innuttaasut Illui assigisaallu.
- 4) Atuakkanik atorniartarfiit.
- 5) Illut iluini silamilu timersornermut atorneqartartut - tassunga ilaatigut ilanngullugit init timersortarfiit aamma Illorsuit Timersortarfiit, naluttarfiit, timigissartarfiit isikkamillu arsaatarfiit.
- 6) Nujalerisut, tagiartuisartut, pannersartittarfiit assigisaallu.

*Imm. 3.* Init tamakkununnгалu attuumassuteqartut nunaminertat tullinnguuttut makku imm. 1-imi piumasagaatinut ilaatinneqanngillat:

- 1) Init taakkununnгалu attuumassutillit nunaminertat, ulluinnarni nioqqtissanik tuniniaanermut pingaarnertut atorneqartartut.
- 2) Allakkeriviit.
- 3) Mittarfiit.
- 4) Pisortatut oqartussani pilersuiffiusunilu init sullissiviit, saaffiginnittarfiit il.il.
- 5) Pisortat angallassissutaannut tunngatillugit utaqqisarfiit.

*Imm. 4.* Inuit tullinnguuttumi allassimasut imm. 1-imi piumasagaammut ilaatinneqanngillat, taamaattorli Covid-19-imut PCR atorlugu misissortinnikkut tunillanneqarsimannginnermik uppersaammik takutitsissapput sivisunerpaamik akunnernik 48-nik pisoqaassuseqartumik:

- 1) Inuit Covid-19-imut akiuussuserneqarnissamik Nunatta Nakorsaaneqarfianit innersuunneqanngitsut matumunnгалu uppersaammik takutitsisnaasut.

2) Sulisut inini pineqartuni imaluunniit tamakkununga attuumassuteqartuni nunaminertani suliallit.

*Imm. 5.* Inuit marluk inorlugit ukiullit imm. 1-mi piunasaqaammut ilaatinneqanngillat.

§ 4. Inuit inatsisitigullu pisussaataasut pisinnaatitaasullu, tassunga ilanngullugit pisortani oqartussat suliffeqarfiillu, ininik § 3, imm. 2-mi pineqartunik pigisallit akiuus-suserneqarsimanermut uppersaammik qinnuiginnissinnaapput.

*Imm. 2.* Imm. 1 naapertorlugu Covid-19-imut tamakkiisumik akiuussuserneqarsimanermut uppersaammik takutitsisoqarsinnaanngippat anisitaasoqarsinnaavoq.

§ 5. Inuit inatsisitigullu pisussaataasut pisinnaatitaasullu, ininik sumiiffinnillu § 3, imm. 2-mi ilaatinneqartunik pigisallit piunasaqaatinik makkuninnga naammassinnissimassapput:

1) Pisisartut, pulaartut assigisaallu § 3 naapertorlugu taamaallaat iseqqusaapput. Nakutilliinerup qanoq pisassaneraniq ilitsersuutit Naalakkersuisunit saqqummiunneqarumaarput.

§ 6. Inuussutissarsiummik ingerlatalik politiit naliliinerat malillugu § 5-imik unioqqutitsisimappat, inuussutissarsiummillu ingerlatalik § 5-imik malinninnissaa ilimagineqanngippat, inuussutissarsiummik ingerlatalik inip piffissami aalajangersimasumi tamanut matoqqatinnissaanik politiit peqquneqarsinnaavoq.

§ 7. Inuk tamakkiisumik akiuussuserneqarnerata kingunitsianngua tamakkiisumillu akiuus-suserneqarsimanermik uppersaasinnaappat inuk Covid-19-imut tamakkiisumik akiuus-suserneqarsimasutut isigineqassaaq.

*Imm. 2.* Nunatta Nakorsaaneqarfiata akiuussuserneqarsimanermut uppersaatit sorliit akuerisaanersut aalajangissavai.

#### *Illoqarfinniit nunaqarfinniillu taaneqartunit angalanermi piunasaqaatit*

§ 8. Inuit § 1, imm. 1 naapertorlugu sumiiffinniit nunap killeqarfiata iluani sumiiffimmut allamut angalasut, Covid-19-imut tamakkiisumik akiuussuserneqarsimanermik uppersaammik takutitsissapput.

*Imm. 2.* Inuit tullinnguuttumi allassimasut akiuussuserneqarsimanissamut imm. 1-imi piunasaqaammut ilaatinneqanngillat, taamaattorli sumiiffinni misissortinnissamut neqeroorfiusuni aallartinnatik Covid-19-imut PCR atorlugu misissortinnikkut tunillan-neqarsimanneginermik uppersaammik takutitsissapput:

1) Inuit angerlarsimaffimminnukarlutik angalasut.

2) Inuit inuiaqatigiinni suliaasaqartitaallutik angalasariaqartut.

3) Inuit Covid-19-imut akiuussutissamik kapitinnissamut Nunatta Nakorsaaneqarfianit inner-suunneqanngitsut.

4) Inuit § 1, imm. 1 naapertorlugu sumiiffinnit nuna qimallugu, nunatta killeqarfiata iluani pisariaqanngitsumik uninngaffiunngitsumik angalasut.

5) Sulisut tamanut angallassissummi pineqartumi aallartussanik atorneqartussanik sulisut.

6) Meeqqat marluniit aqqanilinnik ukiullit.

*Imm. 3.* Meeqqat marluk inorlugit ukiullit imm. 1-imi piumasaqaatinut ilaatinneqanngillat.

*Imm. 4.* Imm. 1-ip aamma 2-p maleruarneqarnissaasa qulakkeernissaa angallassissummik piginnittup akisussaaffigaa.

*Imm. 5.* Piffissami aallarfiusumi PCR atorlugu misissortinneq sivisunerpaamik akunnernik 48-nik pisoqaassuseqaqquusaavoq.

#### *Pingaartumik inunnut Covid-19-imik siusinnerusukkut tunillatsinnikunut*

**§ 9.** Inunnut siusinnerusukkut Covid-19-imik tunillatsinnikuusimasunut PCR-ilu atorlugu misissortinnikkut Covid-19-imik tunillatsissimanerminnik uppernarsaasinnaasunut, piffissami uppernarsaatip atorneqarnerani minnerpaamik ullunik 14-inik annerpaamillu sapaatit akunnerinik aqqaneq-marlunnik pisoqaassusilimmik uppernarsaasinnaasunut tamakkiisumik akiu-ussuserneqarsimasunut malittarisassat atuuttut assingi atuutsinneqarput.

*Imm. 2.* Uppernarsaat suna uppernarsaatitut akuerisatut atorneqassanersoq Nunatta Nakorsaaneqarfiata aalajangissavaa.

#### *Qanermut imaluunniit kiinnamut assiaquteqarnissamut piumasaqaat*

**§ 10.** Inuit aqqaneq-marlunnik sinnerlugillu ukiullit qanermut imaluunniit kiinnamut assiaquteqassapput:

- 1) inini kikkunnit tamanit iserfigineqarsinnaasuni isersimagunik.
- 2) pisiniarfinni kiffartuussinermillu ingerlatsivinni sulisut pisisartunik attaveqarnerminni.
- 3) assartuutini kikkunnit tamanit ilaaffigineqarsinnaasuni, tassunga ilanngullugit bussini taxanilu ilaagunik.

*Imm. 2.* Qanermut imaluunniit kiinnamut assiaquteqarnissamut piumasaqaat ilisimasutsimik annikillimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.

*Imm. 3.* Pisiniarfinni kiffartuussivinnilu sulisut qanermut kiinnamulluunniit assiaqutit atungikkaluarlugit pisiniat sulisullu akornanni plastikimik assiaqutit atorsinnaavaat.

*Imm. 4.* Qanorluunniit immikkoortumi 1-imi allaqqasoqaraluarpat, peqqutissaqarluarpat qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, pisuni imaattuni:

- 1) Nerinermi imaluunniit imernermi.
- 2) Nakorsaatornermi.
- 3) Qarngit aalaneratigut atuaasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaagunik ipiannngulersitsippataluunniit.
- 5) Politiit kinaassutsimik uppernarsaaneranni

**§ 11.** Qanermut assiaqutitut taaneqartut tassaapput qanermut qinngamullu assiaqutit ataasiartakkat imaluunniit annoraaminermiit sanaat allunaasamillu tasisartumilluunniit siutitut ikkuttartut imaluunniit niaqqup tunuatungaani qilertartoq kiinnamullu attuumasoq.

*Imm. 2.* Kiinnamut assiaqutitut tassaapput isinut, qanermut qingamullu assiaqutit plastikimik sanaat kiinnamut attuumanngitsut.

*Inuit pillugit paasisutissanik suliarinninnerit*

**§ 12.** Nalunaarut una naapertorlugu inuup akiuussuserneqarsimaneranut inissisimaffia up-  
pernarsarniarlugu inuit pillugit paasisutissanik suliarinnittoqarsinnaavoq.

*Pineqaatissiisutit*

**§ 13.** § 3, imm. 1-imik aamma §§ 5, 6 imaluunniit 8, imm. 1-inik immaqaluunniit § 10, imm. 1 unioqqutitsisoq pinerluttulerinermik inatsit malillugu pineqaatissinneqarsinnaavoq.

*Imm. 2.* Ingerlatseqatigiiffiit il.il. (inatsisitigut pisussaataasut pisinnaatitaasullu) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

*Atuutilersitsineq aamma atuunneranut piffissaliussaq*

**§ 14.** Nalunaarut ullormi 21. november 2021-mi atuutilissaaq nal. 08:00.

*Imm. 2.* Nalunaarut malillugu killilersuinerit, inerteqqutit, peqqusinerit il.il. 5. december 2021 tikillugu atuutissapput.

*Inatsimmi allami allannguinerit*

**§ 15.** Nuummi Sisimiunilu killilersuinerit pillugit Namminersorlutik Oqartussat utaqqiisaa-gallartumik nalunaarutaanni nr. 60, 29. oktober 2021-mersumi tullinnguuttut allanngortinne-qarput:

1) § 8, imm. 2-mi "30. november 2021" imatut allanngortinneqassaaq. "21. november 2021 nal. 08:00".

**§ 16.** Piffissami 13. november 2021-miit 27. november 2021-p tungaanut Nuummi kil-lilersuinerit pillugit Namminersorlutik Oqartussat nalunaarutaanni nr. 64, 12. november 2021-mersumi tullinnguuttut allanngortinneqarput:

1) § 13, imm. 3-mi "27. november 2021" imatut allanngortinneqarpoq. "21. november 2021 nal. 08:00".

*Namminersorlutik Oqartussat, ulloq 20. november 2021*

**Kirsten Fencker**  
Peqqinnissamut Naalakkersuisoq

/ Aka Olesen